

Ništa manje prijatnog iznenađenja u redovima međunarodnih stručnjaka nije izazvala tzv. tehničko-tehnološka strana organizacije XIV Zimskih olimpijskih igara.

Povremeni stručni dolasci i obilasci svjetskih eksperata za tehnologiju i tehniku na gradilišta olimpijskih objekata i borilišta, naime, postupno su odbacivali ustranu pojedine slutnje i predviđanja da je Sarajevska olimpijada samo grč i potreba jedne nedovoljno razvijene zemlje i da se svijetu, na međunarodnoj sceni, iskaže i potvrdi, ako već ne ekonomskom moći i tehnikom, onda bar društvenom i političkom potvrdom svog osobenog identiteta.

Takve predrasude su se topile iz godine u godinu, iz mjeseca u mjesec, primicanjem zvaničnog otvaranja Igara. Počelo je sve izrazitije da dominira uvjerenje da Sarajevska olimpijada, ustvari, najvješćuje mnogo toga novog, do sada neviđenog na velikim svjetskim olimpijskim manifestacijama. Prevladavao je i kod krajnjih skeptika odlučan startni stav Sarajevske olimpijade da to nisu igre u organizaciji sirotinje; nisu to igre koje samo ljudskom simbolikom, nego i odgovarajućom najsavremenijom tehnikom i tehnologijom ilustruju i potvrđuju duh vremena u kome se one održavaju. Tako je u Sarajevo visoka tehnologija ulazila na velika vrata, uz učešće najeminentnijih domaćih i svjetskih firmi.

Mjerenje vremena na takmičenjima, na primjer, obavljaju ekipe „Swiss-Timinga” i domaćih operatora na opremi koja sadrži dvostruke rezervne uređaje.

Semafori su nabavljeni od proizvođača „Elektronske industrije – Niš” i švajcarske firme „Longines” za dvorane, piste za brzo klizanje i osnovni dio na borilištima (bob, sanjkanje, skijaški skokovi), uz učešće 128 domaćih i stranih stručnjaka.

Kompjuterski sistem je posebno, najsavršenije, prilagođen delikatnom procesu akreditacije učesnika i zvaničnika Igara. Sistem obrade rezultata je višestruko provjeren, i to nakon izvršenog povezivanja mjernih, kompjuterskih i TV-sistema. Dva potpuno neovisna tehnička sistema djeluju sa preko 400 terminalskih jedinica povezanih sa 120 telefonskih linija.

Oprema za ozvučenje je pretežno nabavljena od američke firme „Altec”, a sva vanjska borilišta su unificirana, opremljena, uz zvučnike prilagođene potrebama auditorija. Tu je angažovano 40 stručnjaka.

Softverske projekte izradio je Sveučilišni računarski centar iz Zagreba. Na sistemu je angažovano 460 stručnjaka i operatora.

Distribucija informacija organizovana je uz pomoć tzv. povratnih TV-signala na kojima se sa jedne strane mogu pratiti sva olimpijska zbivanja preko tri „olimpijska” kanala i na tri informativna kanala, direktno povezana sa kompjuterima, na svim TV-aparatima lociranim u regiji Igara.